

er in seinem Handtwerck so er gelernet / seynem vermögen nach ernstlichen fleiß gethan / vnd dahin gesehen auch getrachtet habe / dahin ich vnd mein Collega auch gesehen haben / Namlich das dieses Astronomisch Uhrwerck auffgerichtet würde / dem Tempel zu einer zierdt / Einer Lößlichen Statt Straßburg zu rhum / auch maniglichen so solches sihet zu verwunderung / vnd vnserer Posteritet oder nachkömnen zu ehren / zu letzt vnserer selbst lang werender gedechtnuß.

Also sag ich / hat sich ein jeder vnder vns allen so daran gearbeyt zu ruhmen / aber vnderschiedlich ein jeder nach seynem standt / nach seynen kunst / nach seiner Handtarbeyt / vnd nicht weyers.

Dan wie ohn mich vnd M. David den Handtwercks leütten vnmüglich gewesen / dieses Astronomisch Uhrwerck mit allen den Hauptstückten so jetzt erzelt zu machen vñ auß zufüren / also hergegen so ist auch vns beyden nicht müglichen gewesen / vnserer außrechnung / außtheilung vnd anordnung in das werck zu volziehen / on hilff / beystandt vnd Handtarbeyt der Handtwercks leüten. Solle derhalben ein jeder vnder vns / seines rhums vnd seiner ehren die ihme gebürt sich benügen lassen.

Diß hab ich ettwas weytleißiger außfüren müssen / dieweil vil vnd mancherley reden gangen von diesem Astronomischen Uhrwerck / vñ deren so ihr trewliche vnd fleißige arbeyt daran gethan / wie